

四庫全書

經部

欽定四庫全書

六家詩名物疏卷四十

明 馮復京 撰

小雅谷風之什一

谷風篇

頽

爾雅云焚輪謂之頽李巡曰焚輪暴風從上來降謂之頽頽下也孫炎曰迴風從上下曰頽

蓼莪篇

蔚

爾雅云蔚牡蒿某氏曰江河間曰蒿邢氏曰蔚即蒿之
雄無子者○陸璣云牡蒿也三月始生七月華華似胡
麻華而紫赤八月為角角似小豆銳而長一名馬薪蒿
○本艸馬先蒿陶隱居云一名爛石艸唐本注云葉如
芡蔚紅白色實八月九月熟俗謂之虎麻芡蔚苗短小
子夏中熟而初生二種極相似○陸佃云蔚大於蒿○
羅氏曰蔚無子者今青蒿葉端皆作子如米大蔚獨無

耳

按爾雅藟之醜秋為蒿蔚即蒿之大者莪莖可生食
蒸食香美至秋則變為蒿蔚矣故以喻父母生子以
為美材而卒不得終養也朱子此解勝于舊注但莪
美菜蒿賤艸之訓似以為二物未精明耳蔚古人皆
以為無子故曰牡蒿而本艸注云八九月有實圖經
云入藥當用有子者為正未知何以矛盾

餅

說文餅壺也。或从瓦作瓶。○易云汔至亦未繙井羸其餅凶。○左傳云挈餅之知守不假器。○淮南子云古者抱瓶而汲。○朱傳云瓶小壘大皆酒器。○詩緝云井卦言羸其瓶揚雄酒箴以鷗夷嘲瓶。柳子厚瓶賦以瓶嘲鷗夷。蓋鷗夷盛酒器。瓶汲水器也。

大東篇

七

傳云匕所以載鼎實。疏云雜記云匕用桑長三尺。謂喪

祭也待賓客之匕禮宜用棘○易曰不喪匕鬯○特牲
禮棘心匕刻又云右人於鼎北匕肉左人於鼎西升諸
俎少牢饋食禮雍人概鼎匕于饗饗廩人概甑甗匕與
敦于廩饗有司徹司馬以二手執挑匕枋以挹酒注于
疏匕若是者三又云雍人雍府加匕于鼎東枋雍人覆
二疏匕于俎上○雜記云批以桑長三尺或曰五尺○
三禮圖云匕以載牲體長二尺四寸葉博三寸漆丹柄
頭疏匕形如飯操以棘心為之○說文云柶匕也所以

取飯○陳氏云匕之別有四有黍稷之匕有牲體之匕有疏匕有喪匕三匕以棘喪匕以桑廩人之所擬黍稷之匕也雍人之所擬牲體之匕也牲體之匕挑匕也其制則黍稷之匕小于挑匕挑匕小于疏特牲少牢有司徹公食昏禮舉鼎執匕俎皆異其人士喪禮執匕執俎皆舉鼎者為之吉禮尚文喪禮尚畧故也特牲右人于鼎北匕肉左人于鼎西載諸俎士虞禮則右人載者以吉禮尚右喪禮尚左故也

砥

禹貢荊州厥貢礪砥砮丹蔡氏云礪砥皆磨石砥以細密為名礪以麤礪為稱

杼

說文云杼持緯者也○曹氏云梭也○淮南子云伯余之初作衣也綖麻作縷手經指柱後世為之機杼以便其用

柚

朱傳云受經者○董氏云卷織者也

沆泉

爾雅云沆泉穴出穴出仄出也李巡曰水泉從旁出曰沆○釋名云沆軌也流狹而長如車軌也

獲

爾雅云獲落某氏曰可作柸圈皮鞞繞物不解郭璞曰獲音獲可為杯器素也○陸璣云今榔榆也其葉如榆其皮堅鞞剝之長數尺可為絙索又可為甌帶其材可

為杯器

熊羆裘

傳云言富也○禮書云周禮穴氏掌攻螫獸各以
其物火之以時獻其皮革鄭氏曰螫獸熊羆之屬
冬藏者爾雅云羆如熊黃白文詩曰舟人之子熊
羆是裘則熊羆亦裘之美者也○箋云周世臣子
孫退在賤官使搏熊羆在冥氏穴氏之職○周官
冥氏下士二人穴氏下士一人冥氏掌設弧張為

阱獲以攻猛獸以靈鼓毆之穴氏掌攻蟄獸各以其物
火之

僚

釋詁云僚官也○周官云唐虞稽古建官惟百內有百
揆四嶽外有州牧侯伯夏商官倍○小宰云天官屬六
十地官屬六十春官屬六十夏官屬六十秋官屬六十
冬官屬六十○禮記云有虞氏官五十夏后氏官百殷
二百周三百○左傳云同官為僚○楊用修云寮小牕

古謂同官為寮亦指齋署同牕為義

漿

釋名云漿將也飲之寒溫多少與體相將順也○周禮
酒正辨四飲之物三曰漿注漿今之載漿疏此漿亦是
酒類漿人掌共王之六飲水漿醴涼醫酏入于酒府○
禮記進食之禮酒漿處右又云飲漿水醴濫注云漿酢
載○管子云左酒右漿○素問云今時之人以酒為漿
以妾為常

璣

詳見衛風璣

箋云以瑞玉為佩

漢

爾雅云析木謂之津箕斗之間漢津也注云箕龍尾斗南斗天漢之津梁○大戴禮云七月漢案戶○括地象云河精上為天漢○天官書云漢者金之散氣其本曰水漢星多則多水少則旱○晉書云天漢起東方經尾箕之間謂之漢津乃分為二道其南經傳說魚天篇天

弁河鼓其北經龜貫箕下次絡南斗魁左旗至天津下
而合南道乃西南行又分夾瓠瓜絡人星杵造父騰蛇
王良傳路閣道北端太陵天船卷舌而南行絡五車經
北河之南入東井水位而東南行絡南河闕丘天狗天
紀天稷在七星南而沒○唐志云雲漢自坤抵艮爲地
紀北斗自乾攜異爲天綱○物理論云星者元氣之英
也漢水之精也氣發而升精華上浮宛轉隨流名之曰
天河一曰雲漢衆星出焉○抱朴子云天河從北極分

為兩頭隨天而轉入地下過○博物志云舊說天河與海通

織女

漢書云婺女其北織女織女天女孫也○晉書云織女三星在天紀東端天女也主果蓏絲帛珍寶王者至孝神祇咸喜則織女星俱明天下和平大星怒角布帛貴○焦林大斗記云天河之西有星煌煌與參俱出謂之牽牛天河之東有星微微在氐之下謂之織女○續齊

諧記成武丁云七月七日織女當渡河暫詣牽牛世人至今云織女嫁牽牛也

牽牛

爾雅云星紀斗牽牛也注牽牛斗者日月五星之所終始故謂之星紀又云何鼓謂之牽牛注今荆楚人呼牽牛星為擔鼓擔者荷也疏如此文則牽牛何鼓一星也漢書以為二星郭注順經為說○漢書云牽牛為犧牲其北河鼓河鼓大星上將左左將右右將○晉書云牽

牛六星天之關梁主犧牲事其北二星一曰即路一曰聚火又曰上一星主道路次二星主關梁次三星主南越搖動變色則占之星明大王道昌關梁通

服

傳云服牝服也○周禮云大車牝服二柯有參分柯之二羊車二柯有參分柯之一栢車二柯注大車牝服長八尺謂較也羊車較長七尺栢車較六尺

箱

禮書云輿人之車箱廣六尺六寸隧四尺四寸廣而不
方車人之車箱方而不廣○疏云兩較內容物之處為
箱

長庚

傳云日旦出謂明星為啓明日既入謂明星為長庚庚
續也疏云啓明是太白長庚不知何星或一星出在東
西而異名或二者別星未能審也○廣雅云太白謂之
長庚或謂之太囂注晨見東方為啓明昏見東方為長

庚○前漢天文志云長庚廣如一匹布著天此星見起
兵○鄭樵曰啓明金星長庚水星金在日西故日將出
則東見水在日東故日將沒則西見實二星也

按天文志所云長庚乃變異之象非每昏常見者也
畢

爾雅云濁謂之畢○史記天官書云畢曰罕車為邊兵
主弋獵○後漢蘇竟傳云畢為天網主網羅無道之君
故武王伐紂上祭于畢求助天也○漢書云西方為雨

雨少陰之位也月失中道移而西入畢則多雨書曰星
有好風星有好雨○晉書曰畢八星主邊兵主弋獵其
大星曰天高一曰邊將主四夷之尉也星明大則遠夷
來貢天下安失色則邊兵亂月入畢多雨

斗

朱傳云箕斗二星以夏秋之間見於南方云北斗者以
其在箕之北也或曰北斗常見不隱者也○晉書云北
方南斗六星天廟也丞相太宰之位主褒賢進士稟授

爵祿又主兵一曰天機南二星魁天梁也中央二星天相也北二星天府庭也亦為壽命之期將有天子之事占于斗斗星盛明王道平和爵祿行○易是類謀曰斗機絕網玉衡撥攝提亡五星合狼孤張鄭玄云斗者天中之精天失其平故斗機絕網玉衡撥也攝提者斗前之星為斗施政教布之八野今斗失其政故攝提亦為之亡不見也○文耀鉤云斗者天之喉舌玉衡屬杓魁為璇璣○斗威儀曰審候五色宋均注

曰北斗七星有五色宮商角徵羽各應其星○關令內傳曰北斗一星面百里相去九萬里置二十四氣四宿行四時五方立五星主五嶽也○石氏云第一曰正星主陽德天子之象也二曰法星主陰刑女主之位也三曰令星主中禍四曰伐星主天理伐無道五曰殺星主中央助四旁殺有罪六曰危星主天倉五穀七曰部星亦曰應星主兵○晉書云北斗七星在大微北七政之樞機陰陽之元本也故運乎天中而臨制四方以建四

時而均五行也魁四星為璇璣杓三星為玉衡又曰斗
為人君之象號令之主也又為帝車取乎運動之義也
又魁第一星曰天樞二曰璇三曰璣四曰權五曰玉衡
六曰開陽七曰搖光一至四為魁五至七為杓樞為天
璇為地璣為人權為時玉衡為音開陽為律搖光為星

四月篇

暑

釋名云暑煮也如煮物也○書曰哲時燠若豫恒燠若

○禮曰季夏之月土潤溽暑○稽覽圖曰夏至之後三十日極溫○五經通義曰冬至陽動于下推陰而上之故大寒于上夏至陰動于下推陽而上之故大熱于上故易云日月運行一寒一暑日在牽牛則寒在東井則暑牽牛外宿遠人故寒東井內宿近人故溫也○荀爽傳云夏則火旺其火在天溫煖之氣養生百木

鶉

說文云鵀雕也从鳥敦聲詩曰匪鵀匪鵀雕鵀也鵀鳥

黑色多子師曠曰南方有鳥名曰羗鷺黃頭赤目五色皆備○疏云雕之大者名鷲○廣雅云鷲雕也○倉頡解詁云鷲金喙鳥也見則天下兵能擊殺麋鹿○漢書云鷲鳥累百不如一鷲○埤雅云雕能食艸似鷹而大黑色俗呼皂雕其飛上薄雲漢性刻制今大雕翱翔水上扇魚令出沸波攫而食之一名沸河六翮乘風輕勁堪為箭羽○雅翼云雕者鷲之類土黃色健飛擊沙漠中空中盤旋無細不覩亦能食麋鹿之屬可謂鷲有力

矣就即大雕○山海經云景山多鷲黑色多力○禽經云雕以周之鷲以就之又云沸河在岸則魚涌○相感志云其毛能食諸鳥羽如羣錯艸中有雕毛必衆鳥毛羽自落地

鷲

倉頡解詁云鷲鷲也○說文云鷲鷲鳥也○爾雅云鷲鳥醜其飛也翔○禽經云鷲不擊有貪注不善搏擊貪于攫肉又云風翔則風注風禽鷲類越人謂之風伯飛

翔則天大風○抱朴子云鳶飛在下無力及至乎上聳
身直翅而已○陶隱居云鳶飛騰江湖間捕魚食之○
埤雅云釋鳥鳶飛也翔高飛曰翔布翼不動曰翔鳶鳴
也摩風回翔曲禮曰前有塵埃則載鳴鳶鳶鳴則將風
故也

楸

爾雅云楸赤楸白者楸某氏曰白者為楸其色雖異為
名同江河間楸可作鞍郭璞曰赤楸樹葉細而岐銳皮

理錯戾好叢生山中中為車輞○陸璣云棟葉如柞皮
薄而白其木理赤者為舜棟一名夷白者為棟木皆堅
韌今人以為車轂

北山篇

鞅

疏云鞅讀如馬鞅之鞅○說文鞅頸皮也○釋名云鞅
嬰也喉下稱嬰言纓絡之也○左傳注云在腹曰鞅

掌

釋名云掌言可以排掌也

小明篇

上天

爾雅云冬為上天李巡曰冬陰氣在上萬物伏藏故曰上天○毛傳云自天降鑒則稱上天

亢野

毛氏曰遠荒之地○蘇氏曰亢地名

寒

釋名曰寒捍也捍格也○書云謀時寒若急恒寒若○
禮記云季秋之月霜始降乃命有司曰寒氣總至民力
不堪其皆入室又云天地嚴凝之氣始於西南而盛於
西北此天地之義氣也○稽覽圖云冬至之後三十日
極寒○國語云火見而清風戒寒

罟

廣雅云罟罾魚網謂之罟

除

箋云四月為除○爾雅云四月為余李巡曰四月萬物皆生枝葉故曰余余舒也孫炎曰物之枝葉敷舒

鼓鐘篇

淮

禹貢云導淮自桐栢東會于泗沂東入于海○山海經淮水出餘山○水經云淮水出南陽皮氏縣胎簪山東北過桐栢山○春秋說題辭云淮出桐栢淮者均也均其務○釋名云淮圍也圍繞揚州自北界東至海○一

統志淮水在河南河南府唐縣東南一百八十里即禹貢導淮自桐柏者天下有四瀆此其一也今桐柏支岡有水泉潛流三十里東出大復山經汝寧信陽縣東流會泗沂自泗州龜山北流入淮安府界紫汭府城東入于海

磬

周禮鼓人以磬鼓鼓役事韞人為臯鼓長尋有四尺鼓四尺倨勾磬折○樂書云磬鼓以臯為義欲役之緩

謂之臯鼓臯鼓中高而兩端下

三洲

疏云水中可居曰洲淮上地也

笙磬

毛云笙磬東方之樂朱云琴瑟在堂笙磬在下○釋名云磬磬也聲堅磬磬然堅緻也○爾雅云大磬謂之磬注云磬形似犁鎡以玉為之又云徒擊磬謂之蹇○尚書夔云於予擊石拊石百獸率舞庶尹允諧又云徐州

泗濱浮磬○周禮小師正樂縣之位凡縣鐘磬半為堵
全為肆眡瞭掌擊頌磬笙磬磬師掌教擊磬擊編鐘教
縵樂燕樂之鐘磬磬氏為磬倨勾一矩有半其博為一
股為二鼓為三參分其股博去一以為鼓博參分其鼓
博以其一為之厚已上則摩其旁已下則摩其端○儀
禮大射樂人宿縣于阼階東笙磬西面西階之西頌磬
東面注云笙猶生也東為陽中萬物以生是以東方鐘
磬謂之笙皆編而懸之言成功曰頌西為陰中萬物之

所成是以西方鐘磬謂之頌○禮記云石聲磬磬以立
辨辨以致死君子聽磬聲則思死封疆之臣又云叔之
離磬○世本云無句作磬堯臣也○樂錄云磬叔所造
○通禮義纂云黃帝使伶倫造磬○白虎通云磬者夷
則之氣也象萬物之盛也有貴賤焉親疎焉長幼焉三
者行然後王道得萬物成天下樂用磬也○樂經云黃
鐘磬前長二律二尺七寸後長二律一尺八寸此謂特
懸大磬配鑄鐘者也孔子在衛所擊謂編磬○鬻子注

云磬聲消躁而近于悲故憂而擊磬○樂書云石堅實而不動其卦則乾其時則秋冬之交其方則西北之維其風不周其聲尚角其音則辨立冬之氣也先王以為磬之屬焉小華之山其陰多磬鳥危之山其陽多磬高山涇水出焉其中多磬要之一適陰陽之和者泗濱所貢浮磬而已其用編之則雜而小離之則特而大

音

樂記云凡音之起由人心生也人心之動物使之然也

感于物而動故形于聲聲相應故生變變成方謂之音
比音而樂之及于戚羽旄謂之樂○周禮太師播之以
八音金石土革絲木匏竹又云教六詩以六律為之音

雅

箋云雅萬舞也

詳見邶風

○朱傳云雅二雅也○

子夏曰言天下之事形四方之風謂之雅雅者正
也言王政之所由廢興也政有小大故有小雅焉
有大雅焉○周禮太師教六詩曰風曰賦曰比曰

興曰雅曰頌以六德為之本以六律為之音○鄉
飲酒禮燕禮云工歌鹿鳴四牡皇皇者華笙入樂南陔
白華華黍乃間歌魚麗笙由庚歌南有嘉魚笙崇丘歌
南山有臺笙由儀乃合樂燕禮又云若以樂納賓升歌
鹿鳴下管新宮大射云歌鹿鳴管新宮○左傳穆叔云
文王兩君相見之樂也鹿鳴君所以嘉寡君也四牡君
所以勞使臣也皇皇者華君教使臣五善季札請觀于
周樂為之歌小雅曰美哉思而不貳怨而不言其周德

之衰乎猶有先王之遺民焉為之歌大雅曰廣哉熙熙乎曲而有直體其文王之德乎

南

傳云南夷之樂曰南○薛君章句云四夷之樂惟南可以
和于雅者以其人聲及籥不僭差也○文王世子云
胥鼓南注云南南夷之樂也胥掌以六樂之會正舞位
明堂位曰昧東夷之樂也任南蠻之樂也納夷蠻之樂
於大廟言廣魯於天下也○周禮韎師掌教韎樂祭祀

則帥其屬而舞之大饗亦如之旄人掌教舞散樂舞夷
樂鞮鞻氏掌四夷之樂與其聲歌祭祀則歛而歌之燕
亦如之○孝經鉤命決云東夷之樂曰昧持矛助時生
南夷之樂曰任持弓助時養西夷之樂曰侏離持鉞助
時殺北夷之樂曰禁持盾助時藏皆於四門之外右辟○
樂元起曰南夷之樂曰兜西夷之樂曰禁北夷之樂曰
昧東夷之樂曰離東夷持矛舞南夷持羽舞西夷持戟
舞北夷持干舞○白虎通曰南之為言任也任養萬物

一說東方持矛南方歌西方戚北方擊金○正義云言南得總四夷者以周之德先致南方○朱傳云南二南也○呂氏春秋云塗山氏女令其妾待禹於塗山之陽女乃作歌曰候人兮猗實始作為南音周公及召公取風焉以為周南召南○周禮樂師凡射王以騶虞為節諸侯以貍首為節大夫以采蘋為節士以采芣為節磬師教燕樂之鐘磬注燕樂房中之樂所謂陰聲也鐘師凡祭祀饗食奏燕樂笙師燕樂共其鐘

笙之樂○鄉飲酒禮笙入間歌乃合樂周南關雎葛覃
卷耳召南鵲巢采芣采蘋注云王后國君夫人房中之
樂歌也又云乃息司正鄉樂惟欲注云鄉樂周南召南
六篇之中唯所欲作不從次也鄉射禮笙入立于縣中
西面乃合樂周南關雎葛覃卷耳召南鵲巢采芣采蘋
又云歌騶虞若采蘋皆五終燕禮間歌魚麗以下至笙
由儀遂歌鄉樂周南關雎葛覃卷耳召南鵲巢采芣采
蘋若以樂納賓笙入三成遂合鄉樂若與四方之賓燕

有房中之樂注云絃歌周南召南之詩而不用鐘磬之節也謂之房中者后夫人所諷誦以事君子○左傳吳公子札請觀于周樂為之歌周南召南曰美哉始基之矣猶未也然勤而不怨矣

六家詩名物疏卷四十

欽定四庫全書

六家詩名物疏卷四十一 明 馮復京 撰

小雅谷風之什二

楚茨篇上

倉

釋名云倉藏也藏穀物也○月令云季春發倉廩賜貧窮孟冬命有司修囷倉務積聚○周禮倉人掌粟入之藏辨九穀之物以待邦用若穀不足則止餘散用有餘

則藏之以待凶而頒之

庾

釋名云庾裕也言盈裕也○周語云野有露積韋昭云
庾露積穀也○疏云庾積粟未入倉露地積聚之九章
算術平地委粟是也

享祀

疏云享祀雖總於祭因在前則為灌及朝踐○郊特牲
云周人尚臭既灌然後迎牲詔祝於室坐尸於堂注云

謂朝事時也○禮書云尸入既裸于室然後延之於戶
西坐於主東南面行朝踐之禮是時君出迎牲蕭載臠
膾合黍稷烝于爐然後詔以羹定焉其禮亦謂之朝事
又謂之朝獻以象朝時之所養也

妥

疏云妥侑當饋食之節○郊特牲云舉斝角詔妥尸注
云妥安坐也尸始入舉奠斝若奠角將祭之祝則詔主
人拜安尸使之坐尸即至尊之坐或時自不安時則以

拜安之○少牢禮云尸即席坐主人拜妥尸即奠○賈公彥云天子諸侯大夫士雖同名饋食仍有小別何者天子諸侯食前仍有饋獻一是饋熟陰厭陽厭尸入室乃獻大夫士則饋熟與黍稷為陰厭陽厭前無饋獻以此為異耳○禮書云羹定詔於堂然後延主于奧尸坐其北主人拜妥尸而奠爵舉焉俎則載合亨之熟而簋簋之黍稷進焉又云周官掌次祭祀張尸次于廟門之西及其入也主人立于阼階東西南面尸盥而進升自

西階主人升自阼階祝從尸主人從祝尸入即席東面而坐祝主人西南而立皆拜妥尸尸答拜遂坐而按祭

侑

特牲禮云尸三飯告飽祝侑之如初○少牢禮云尸三飯又食食馘又食舉腊肩又食舉牢骼又食告飽祝侑曰皇尸未實侑尸又食舉牢肩尸不飯主人不言拜侑尸又三飯○太祝云辨九擗以享右祭祀注云右讀為侑勸尸食而拜又云逆尸令鐘鼓右亦如之○鄭氏云

食大名小數曰飯士九飯大夫十一飯其餘有十三飯十五飯賈公彥云一口謂之一飯士三飯即告飽而侑大夫七飯而侑諸侯九飯而侑天子十一飯而侑

絜牛羊

疏云鮮絜爾王者所祀之牛羊於周禮司徒奉牛司馬奉羊○劉執中云絜者在滌而芻之也○郊特牲云帝牛必在滌三月稷牛惟具○周禮充人掌繫祭祀之牲牲祀五帝則繫于牢芻之三月享先王亦如之

按絜字古屑奚結二音潔字古通作絜故孔疏云鮮絜所祀之牛羊也朱傳無明說今俚儒以絜為度義出自妄臆

剥

鄭云有解剥其皮者○禮運曰腥其俎孰其殽注云腥謂豚解而腥之孰謂體解而爛之孔氏云豚解腥之是解剥其肉體解爛之是煮孰之者陳祥道云國語曰禘郊之事則有全胥王公立飫有房胥親戚燕飲有殽胥

全胥豚解也房胥體解也殼胥骨折也士喪禮特豚四鬻去蹄兩肱脊既夕鼎實羊左胖亦如之然則四鬻者殊左右肩髀而為四又兩肱一脊而為七此所謂豚解也士喪禮畧豚解而已至虞然後豚解體解兼有焉若夫正祭則天子諸侯有豚解體解大夫有體解無豚解以其無朝踐獻腥之禮故也○周禮內饗凡宗廟之祭祀掌割亨之事司士凡祭祀帥其屬而割牲

亨

周禮內饗掌王及后世子膳羞之割亨煎和之事凡宗廟之祭祀掌割亨之事外饗掌外祭祀之割亨共其脯修刑膾陳其鼎俎實之牲體魚腊凡賓客之饗殽饗食之事亦如之邦饗耆老孤子士庶子掌割亨之事亨人掌共鼎鑊以給水火之齊職外內饗之饗亨煮辨膳羞之物祭祀共太羹鉶羹賓客亦如之

肆

傳云肆陳也或陳于牙疏地官牛人云凡祭祀共其牛

牲之牙注云牙若今屠家縣肉架則肆謂既殺乃陳之於牙上也○箋云有肆其骨體于俎者釋文肆他歷反○禮運云然後退而合亨體其犬豕牛羊注云謂分別骨體之貴賤以為衆俎也○禮書云周禮王之牲事冢宰太僕贊之五官共奉之內饗外饗割亨之司士帥其屬而割羞諸子正其牲體肱骨三肩臂臑也股骨三肫胙胾也脊骨三正脊腓脊橫脊也脅骨三代脅長脅胙肩也正脊之

前則膾也肫之上則髀也然則左右肱之肩臂臑與左
右股之肫肱髀而為十有二脊骨三與左右脅骨六而
為九二髀正祭不薦於神尸主人之俎兩髀不升於主
人主婦之俎膾不升於吉祭之俎則祭之所用者去髀
膾而二十有一去二髀而為十九矣祭統曰商人貴髀
周人貴肩以周人之禮觀之脅貴中而賤兩端骨貴右
而賤左貴前而賤後貴上而賤下

將

傳云將齊也王肅云分齊其肉所當用○箋云有奉持而進之者疏云是司徒小子之類然羣臣助祭各有所掌奉持進之非獨此二職而已○大司徒云祀五帝奉牛牲羞其肆享先王亦如之小子職云掌祭祀羞羊肆羊殽肉豆

祝

周禮太祝掌六祝之辭以事鬼神亦祈福祥求永貞掌六祈作六辭辨六號九祭九拜凡大禋祀肆享祭亦則

執明水火而號祝隋釁逆牲逆尸令鐘鼓右亦如之來
瞽令皋舞相尸禮既祭令徹小祝掌小祭祀大祭祀逆
盥盛送逆尸沃尸盥贊隋贊徹贊奠凡事佐太祝喪祝
掌喪祭之祝號甸祝掌表貉之祝號詛祝掌盟詛類造
攻說檜禴之祝號○儀禮士喪既夕有夏祝商祝士虞
特牲饋食少牢饋食皆有祝

祭

周禮大宗伯以吉禮事邦國之鬼神示○尚書大傳云

祭之為言察也。察者至也。至者人事也。人事至然後祭。祭者薦也。薦之為言在也。在者在其道也。○禮記云。禮有五經。莫重於祭。夫祭者非物自外至者也。自中出生於心者也。心怵而奉之以禮。是故惟賢者能盡祭之義。

祊

爾雅云。閑謂之門。郭注引詩曰。祝祭于祊。疏云。案祊本廟門之名。設祭於廟門。因名其祭。亦名祊。凡祊有二種。

一是正祭之時既設於廟又求神於廟門之內郊特牲云索祭祝于祊及詩云祝祭于祊注云祊平生門內之旁待賓客之處與祭同日也二是明日繹祭之時設饌於廟門外西室亦謂之祊即郊特牲注云祊之禮宜於廟門外之西室及禮器云為祊乎外是也然則廟門內外皆有祊稱○郊特牲曰直祭祝于主索祭祝于祊不知神之所在乎彼乎于此乎或諸遠人乎祭于祊尚曰求諸遠者與祊之為言倮也○說文作髣云門內先祖

所彷徨也○王氏云凡祀祿鬯則求諸陰炳蕭則求諸陽索祭祀于祊則求諸陰陽之間蓋鬼無不之神無不在求之之備如此

神保

朱傳云神保蓋尸之嘉號○禮記曲禮云為人子者祭祀不為尸又云孫可以為王父尸子不可以為父尸曾子問孔子曰祭成喪者必有尸尸必以孫孫幼則使人抱之無孫則取于同姓可也祭殤必厭蓋弗成也禮器

云周坐尸詔侑武方其禮亦然其道一也夏立尸而卒祭殷坐尸周旅酬六尸郊特牲云舉鬯角詔妥尸古者尸無事則立有事而後坐也尸神象也小記父為士子為天子諸侯則祭以天子諸侯其尸服以士服父為天子諸侯子為士祭以士其尸服以士服少儀婦人為尸坐則不手拜雜記孔子云尸弁冕而出卿大夫士皆下之尸必式必有前驅祭統云尸謬君與卿四人餞尸在廟外則疑于臣在廟中則全于君又云尸飲三衆賓飲

一示民有上下也○周禮掌次凡祭祀張尸次守祧祭
祀各以其服授尸大司樂尸出入則令奏肆夏大祝凡
大禋祀肆享祭亦則執明火而號祝隋則執鸞逆牲逆
尸令鐘鼓侑亦如之相尸禮小祝大祭祀逆尸沃尸盥
節服氏郊祀裘冕二人執戈送逆尸士師若祭勝國之
社則為之尸祀五帝則沃尸○士虞禮尸服卒者之上
服男男尸女女尸必使異姓不使賤者○逸禮記祫禮
云毀廟之主升合食而立二尸○曾子云王者宗廟以

卿為尸不以公為尸辟嫌也○禮書云天子諸侯之尸以卿大夫則幼者不與禮曰尸必以孫孫則使人抱之此大夫士之禮與喪禮始喪而奠則無尸以人道事之也既葬而祭則有尸以神道事之也祭祀同几則一尸儀禮曰男男尸女女尸謂虞祭也大夫前祭一日筮尸士前祭三日筮尸大夫于尸再宿而一戒士于尸一宿而無戒推而上之人君蓋亦前三日筮尸而宿戒之儀又加隆矣

饗

釋名云饗銓也銓度甘辛調和之處也○禮記云孟夏其祀竈又云臧文仲焉知禮燔柴於竈竈者老婦之祭也故盛於盆尊於瓶又云庶士庶人立一祀或立戶或立竈○士虞禮側亨于廟門外之右東面魚腊饗亞之北上饗饗在東北西面特牲饋食主人視饗饗于西堂下亨于門外東方西面北上記云牲饗在廟門外魚腊饗在其南饋饗在西壁尸卒食而祭饗饗雍饗少牢饋

食禮雍爨在門東南北上廩爨在雍爨之北○淮南子云黃帝作竈死為竈神○白虎通云夏祭竈者火之主人所以自養也

俎

周禮膳夫云王日一舉鼎十有二物皆有俎○禮記云取俎進俎不坐又云鼎俎奇而籩豆偶陰陽之義也又云凡羞有俎者則於俎內祭其有折俎者取祭反之不坐燔亦如之又云俎有虞氏以梲夏后氏以巖殷以楫

周以房俎又云三牲之俎八簋之實美物備矣又云凡為俎者以骨為主骨有貴賤殷人貴髀周人貴肩是故貴者取貴骨賤者取賤骨俎者所以明惠之必均也○三禮圖云椀長二尺四寸廣一尺二寸高一尺諸臣加雲氣天子犧飾之夏俎名巖巖亦如椀而橫柱四足中央如距也○褚遂良云舜造漆器禹雕其俎

按俎之制有四虞曰椀斷木為四足而已夏曰巖中足為橫距之象殷曰楨如枳楨之曲撓周曰房俎足

下有跗如堂房其長皆二尺二寸廣一尺二寸高一尺其用之別甚多一曰薦腥謂豚解而腥之殊兩肩兩髀兩肋與脅為七體此上古之禮也二曰薦燂謂體解而燂之又分豚解為十一體以湯燂之而不全熟此中古之禮也三曰薦熟以其所燂者先煮于鑊既熟則以鼎重煮之升于俎此近代之禮也又割其餘以制之則有燔炙之事俎由鼎而升有九聘禮牛一羊一豕三魚四腊五腸胃六膚七鮮魚八鮮腊九

是也去鮮魚鮮腊則為七俎矣公食大夫禮上大夫
九俎下大夫七俎是也又去其二則為五少牢陳五
鼎羊一豕二膚三魚四腊五腸胃從羊五鼎五俎是
也又去其二則為三特牲三鼎牲鼎一魚鼎二腊鼎
三亦有三俎是也此皆正俎天子諸侯大夫士之所
以別也為俎骨有貴賤鄉飲鄉射禮賓俎脊脅肩肺
主人俎脊脅臂肺之類是也又有陪俎非正俎則臠
臠臠之三臠臠者羹也即鉶羹也牛臠為臠羊臠為

臠豕臠為曉又有肝俎所以載心舌而燔炙皆從獻之物故鄭箋以為從獻之俎九俎皆進於神前其尸既濟而反其餘於肝俎者謂之尸俎尸俎之外又有主人主婦祝佐賓長兄弟宗人衆賓及衆兄弟內賓宗婦公有司之俎牲之升俎必有物以盛之意即掌蜃之蜃器也主人受尸酢之俎謂之胙俎其俎最尊天子之祭膳夫親徹之王賓客禮食亦有焉

燔

傳云燔取胙臂○禮器云君親制祭夫人薦盞注親制祭謂朝事進血臂時郊特牲云取胙臂燔燎升首報陽也祭義云祭之日君牽牲既入廟門麗于碑鸞刀以割取胙臂乃退燭祭注云胙臂血與腸間脂也又云建設朝事燔燎羶薌見以蕭光以報氣也此教衆反始也○箋云燔燔肉也疏云燔者火燒之名難熟者近火故肉燔也亦為鬻貫之以爇于火非炮燒之也○士虞主婦亞獻尸賓以燔從獻祝佐食皆如初賓長三獻燔從如

初儀特牲饋食主婦亞獻尸兄弟長以燔從尸受振祭
濟之反之羞燔者受加于胙出獻祝燔從如初儀賓三
獻燔從如初有司徹云次賓羞羊燔豕燔○周禮量人
凡祭祀饗賓掌其從獻脯燔之數量

炙

傳云炙肉也疏云傳以炙為炙肉則是薦俎非從獻也
箋云肝肝炙也疏云炙者遠火之稱易熟者遠之故肝
炙也○士虞主人醑尸賓長以肝從實于俎縮用鹽特

牲云主人洗角升酌醑尸賓長以肝從尸取肝煑于鹽
振祭臠之加于菹豆獻祝以肝從主婦致爵于主人肝
從燔亦如之主人致爵于主婦宗婦薦豆俎從獻皆如
主人少牢禮主人醑尸賓長羞牢肝縮進末獻祝羞牢
肝

君婦

箋云君婦謂后也凡嫡妻稱君婦事舅姑之稱也○釋
名云天子之配曰后言在後不敢以副言也諸侯之配

曰夫人夫扶也扶助其君也卿之配曰內子言在閨
門之內以治家也大夫之配曰命婦婦服也服家事
也○禮記云古者天子立后六宮三夫人九嬪二十
七世婦八十一御妻以聽天下之內治以明章婦道
○白虎通云天子之配謂之后后者君也○後漢書
周禮王者立后后正位宮闈同體天王夫人坐論婦
禮九嬪掌教四德世婦主喪祭賓客女御叙于王之
燕寢頒官分務各有典司女史彤管記功書過居有

阿保之訓動有環佩之響進賢才以輔佐君子哀窮
窶而不淫其色所以能述宣陰化修成內則閨房肅
雍陰謂不行者也○初學記云按夏殷以前后妃之
制其文畧矣大率皆稱妃故黃帝有四妃帝嚳四妃
周則天子立后秦稱皇帝正嫡曰皇后○周禮內宰
大祭祀后灌獻則贊瑤爵亦如之凡建國佐后立市
中春詔外內命婦治蠶于北郊上春詔皇后帥六宮
之人生種稷之種而獻之于王九嬪凡祭祀贊后

薦徹豆籩若有賓客則從后世婦帥女功而擢概為齋
盛及祭之日涖陳女宮之具凡內羞之物女御凡祭祀
贊世婦大宗伯凡大祭祀王后不與則攝而薦豆籩徹
大賓客則攝而載果內宗掌宗廟之祭祀薦加豆籩及
以樂徹則佐傳豆籩賓客之饗食亦如之王后以樂羞
齋則贊凡王后之獻亦如之王后不與則贊宗伯○禮
記云王后蠶於北郊以共純服夫人蠶於北郊以共冕
服王后夫人非莫蠶也身致其誠信也及時將祭先期

旬有一日宮宰宿夫人夫人亦散齋七日致齋三日君致齋於外夫人致齋於內然後會於太廟君純冕立於阼夫人副褱立於東房君執圭瓚裸尸大宗伯執璋瓚亞裸及迎牲君執紃宗婦執盎從夫人薦浼水君執鸞刀羞齋夫人薦豆此之謂夫婦親之○特牲云主婦纚笄宵衣立于房中南面洗爵于房酌亞獻尸少牢云主婦被錫衣侈袂薦自東房韭菹醢醢坐奠于筵前贊者執葵菹羸醢以授主婦遂受陪設于東主婦興入于房

自東房執一金敦黍有蓋坐設於羊俎之南婦贊者執
敦稷以授主婦主婦興受坐設于魚俎之南又興受贊
者敦黍坐設于稷南又興受贊者敦稷坐設于黍南主
婦興入于房又云主婦洗爵于房中出酌入戶西面拜
獻尸尸拜受主婦主人之北西面拜送爵

獻酬交錯

祭統云尸飲五君洗玉爵獻卿尸飲七以瑤爵獻大夫
尸飲九以散爵獻士及羣有司皆以齒○特牲云三獻

主人酌西階上獻賓薦脯醢設折俎賓卒爵主人酌酢
卒爵降奠于其位衆賓升受爵坐祭立飲主人洗觶酌
于西方之尊西階前北面酬賓賓奠觶于薦南揖復位
主人洗爵獻長兄弟于阼階上如賓儀洗獻衆兄弟如
衆賓儀洗獻內兄弟于房中如獻衆兄弟之儀嗣舉奠
兄弟弟子洗酌于東方之尊舉觶于長兄弟如主人酬
賓儀賓坐取觶酬長兄弟長兄弟卒觶衆賓及衆兄弟
交錯以辯皆如初儀長兄弟酬賓如賓酬兄弟之儀以

辯卒受者實觶于筐賓弟子及兄弟子舉觶于其長
皆奠觶揖其弟子爵皆無算有司徹云主人酌獻賓于
西階上衆賓長升拜受爵坐祭立飲辯受爵乃升長賓
主人酌酢于長賓西階上北面飲卒爵宰夫洗觶升主
人受酌酬長賓于西階南北面遂飲卒爵主人卒洗升
酌賓拜受坐奠爵于薦左主人獻兄弟于阼階上辯受
爵洗獻內賓于房中獻私人于阼階上二人洗觶升實
爵西楹坐奠爵尸侑卒爵尸酬主人主人酬侑于西楹

卒爵主人復筵乃升長賓侑酬之如主人之禮至于衆
賓遂及兄弟私人兄弟之後生舉觶于其長賓及兄弟
交錯其酬皆遂及私人爵無算若不賓尸賓拜受爵洗
酌醋于主人卒爵賓以爵降奠于篚主人洗獻衆賓獻
兄弟與內賓與私人皆如儗禮賓長獻于尸尸醋獻祝
致醋賓兄弟交錯其酬無算爵

六家詩名物疏卷四十一

欽定四庫全書

六家詩名物疏卷四十二 明 馮復京 撰

小雅谷風之什三

楚茨篇下

祝告

箋云祝致神意造主人使受嘏嘏之禮祝徧取黍稷牢肉魚孺于醢以授尸孝孫前就尸受之天子使宰夫受之以筐祝則釋嘏辭以勅之○禮運曰修其祝嘏又云

祝以孝告嘏以慈告又云天子祭宗廟諸侯祭社稷祝

嘏莫敢易其常是謂大嘏曾子問曰攝主不假當作嘏郊

特牲曰嘏長也大也○特牲饋食尸九飯主人醕尸尸

酢主人佐食搏黍稷授祝祝授尸尸授以菹豆執以親

嘏主人主人左執角再拜稽首受復位詩懷之實于左

袂挂于季指卒角拜尸答拜主人出寫醬于房祝以籩

受少牢饋食尸十二飯主人醕尸尸酢主人上佐食以

綏祭二佐食各取黍于一敦上佐食兼受搏之以授尸

尸執以命祝卒命祝祝受以東北面于尸西以嘏于主人曰皇尸命工祝承致多福無疆于女孝孫來女孝孫使女受祿于天宜稼于田眉壽萬年勿替引之主人坐奠爵興再拜稽首興受黍坐振祭齊之詩懷之實于左袂挂于季指執爵以興坐卒爵執爵以興出宰夫以籩受嗇黍主人嘗之納諸內

孝孫徂位

箋云祭禮畢孝孫往位堂下西面位祝于是致孝孫之

意告尸以利成疏云孝孫在堂下西面則祝當以西階下告○特牲云主人出立于戶外西南祝東向告利成尸謖注云利猶養也供養之禮成少牢云主人出立于阼階上西面祝出立于西階上東面祝告曰利成祝入尸謖賈公彥云特牲戶外告利成少牢階上告利成以尊者稍遠于尸若天子諸侯禮畢于堂下告利成

送尸

大司樂云尸出入奏肆夏○樂師教樂儀行以肆夏○

鐘師凡樂事以鐘鼓奏九夏肆夏杜子春云呂叔玉云肆夏周頌時邁也肆遂也夏大也言遂于大位謂王位也玄謂九夏皆詩篇名

按尸出入奏肆夏天子之禮也古注以楚茨之詩為思古明王故箋用周禮之文朱子以為述公卿有田祿者力農奉祭則與天子之禮不同而此傳云奏肆夏未知所出考之儀禮大射公升即席奏肆夏燕禮賓及庭奏肆夏則諸侯得奏肆夏天子畿內公卿比

外諸侯或亦奏肆夏未可知但天子公卿及諸侯祭禮亡無所據證朱子此篇之傳如主人往阼階下西面聽告利成皆準少牢饋食禮少牢饋食者諸侯卿大夫之祭禮也其儀告利成後祝入尸謖主人降立于阼階東西面祝先尸從遂出于廟門無鼓鐘送尸之事故特牲云大夫之奏肆夏也由趙文子始也是諸侯之卿大夫不得奏肆夏也

諸宰

周禮膳夫上士二人中士四人下士八人凡王祭祀賓客食則徹王之胾俎注云膳夫親徹胾俎胾最尊也餘則其屬徹之

徹

周禮膳夫祭祀賓客食徹王之胾俎九嬪祭祀徹豆籩內宗及以樂徹則佐傳豆籩外宗佐王后眡豆籩以樂徹亦如之樂師及徹帥學士而歌徹小師大祭祀徹歌○特性云宗婦徹祝豆籩入于房徹主人薦俎佐食徹

尸薦俎賓出佐食徹胙俎堂上俎畢出有司徹云司士歸尸侑之俎主人退有司徹若不賓尸衆賓出婦人乃徹徹室中之饌

燕私

禮記云若公與族燕則異姓為賓膳宰為主人公與父兄齒族食世降一等又云旁治昆弟合族以食序以昭穆別之以禮義人道竭矣又云因其酒肉聚其宗族以教民睦○特牲禮俎出于廟門徹庶羞設于西序下注

云庶羞主為尸非神饌也此徹庶羞置西序下者為將燕飲自尸祝至兄弟之庶羞宗子以與族人燕飲于堂內賓宗婦之庶羞主婦以燕飲于房○尚書傳云宗室有事族人皆侍終日大宗已侍于賓奠然後燕私燕私者何也已而與族人燕也飲而不醉是不親醉而不出是不敬○禮書云族燕禮服皮弁服即于路寢宰夫為主異姓為賓王與族人燕于堂后帥內宗之屬燕于房其物穀烝所以合好也其食世降一等所以辨親疎也

昭穆以序之所以明世次也夜飲以成之所以別異姓也若夫几席之位升降之儀脫屣而坐立監相禮羞庶羞以盡愛爵樂無算以盡歡大率與諸侯燕禮不異

樂

尚書云予欲聞六律五聲八音在治忽以出內五言又曰聲依永樂和聲八音克諧無相奪倫神人以和○禮記云比音而樂之及于戚羽旄謂之樂○周禮大司樂以樂舞教國子以六律六同五聲八音六舞大合樂以

致鬼神亦以和邦國以諧萬民以安賓客以悅遠人以
作動物太師合陰陽之聲陽聲黃鐘太簇姑洗蕤賓夷
則無射陰聲大呂應鐘南呂函鐘小呂夾鐘皆文之以
五聲宮商角徵羽皆播之以八音金石土革絲木匏竹
教六詩曰風曰賦曰比曰興曰雅曰頌○樂緯云黃帝
之樂曰咸池顓頊曰六莖帝嚳曰五英堯曰大章舜曰
簫韶禹曰大夏殷曰大濩周曰勺又曰大武是以清和
上升天下樂其風俗鳳凰來儀百獸率舞神龍升降靈

龜晏寧

稽首

周官大祝辨九擯一曰稽首注云拜頭至地也

信南山篇

甸

箋云南山之野禹治而丘甸之六十四井為甸甸方八里居一成之中成方十里出兵車一乘以為賦法○周禮小司徒經土地而井牧其田野九夫為井四井為邑

四邑為丘四丘為甸四甸為縣四縣為都以任地事而
令貢賦凡稅斂之事注此謂造都鄙也采地制井田異
于鄉遂四丘為甸甸之言乘也讀如束甸之甸甸方八
里旁加一里則方十里為一成積百井九百夫其中六
十四井五百七十六夫出田稅三十六井三百二十四
夫治洫又云稍人掌令邱乘之政令○司馬法曰四井
為邑四邑為丘馬一匹牛三頭是曰匹馬丘牛四丘為
甸六十四井出長轂一乘馬四匹牛十二頭甲士三人

步卒七十二人戈楯具謂之乘馬又曰六尺為步步百為畝畝百為夫夫三為屋屋三為井井十為通通為匹馬三十家士一人徒二人通十為成成百井三百家革車一乘士十人徒二十人成十為終終千井三千家革車十乘士百人徒二百人十終為同同方百里萬井三萬家革車百乘士千人徒二千人○賈公彥云一成惟三百家革車一乘士十人徒二十人此謂天子畿內采地法鄭注論語道千乘之國亦引司馬法彼是畿外邦

國法革車一乘甲士三人步卒七十二人甲士少步卒多此比畿外甲士多步卒少外內有異故也

曾孫

疏云曾者重也自曾孫以至無窮皆得稱曾孫

疆理

傳云疆畫經界理分地理疏經界者地畔之名分地理者分別地所宜之理若孝經注云高田宜黍稷下田宜稻麥是也○朱傳云疆者為之大界也理者定其溝塗

也○周禮遂人凡治野夫間有遂遂上有徑十夫有溝溝上有畛百夫有洫洫上有涂千夫有澮澮上有道萬夫有川川上有路以達于畿匠人為溝洫耜廣五寸二耜為耦一耦之伐廣尺深尺謂之畎田首倍之廣二尺深二尺謂之遂九夫為井井間廣四尺深四尺謂之溝方十里為成成間廣八尺深八尺謂之洫方百里為同同間廣二尋深二仞謂之澮專達于川賈公彥云遂人為溝洫法遂

縱溝橫洫縱澮橫九澮而川周其外以彼遂在夫間故以南畝遂則縱矣匠人井田法云田首倍之為遂以南畝圖之遂即橫也

同雲

埤雅云古文雲字作云象雲回轉之形其上从二二者天中之陰也天中之陰應之於上故地中之陽升而為雲詩曰上天同雲冬曰上天燠則雲暘而異寒則雲陰而同故也

霖霖

爾雅云小雨謂之霖霖○釋名云霖霖小雨也言裁霖
霑霑清如人沐頭惟及其上枝而根不濡也

場

孔氏云以田之疆畔至此而易主名之為場

廬

孔氏云古者宅在都邑田於外野農時出而就田須有
廬舍○班固曰井方一里是為九夫八家共之各受私

田百畝公田十畝是為八百八十畝餘二十畝以為廬舍又曰還廬樹桑菜茹有畦瓜瓠果蓏殖于疆場在野曰廬在邑曰里○說文云廬寄也春夏居秋冬去○春秋井田記人受田百畝公田十畝廬舍在內貴人也公田次之重公也私田在外賤私也○邱氏曰公田百畝內除二十畝為八家治田之廬○董氏云井九百畝其中為公田八家每廬舍二畝半

按公田百畝餘二十畝為廬舍其說出于漢書食貨

志鄭注匠人云野九夫而稅一則鄭意無家各二畝
半為廬之事

菹

詳見豳風豆

說文云酢菜也○周禮醢人掌四豆之實王舉共醢以
七菹實之○記云恒豆之菹水草之和氣○疏周禮場
人祭祀共果菹是祭必有瓜菹醢人豆實無瓜菹者文
不具○采蘋傳云公侯夫人執蘋菜以助祭王后則苴
菜

清酒

箋云清謂玄酒也酒鬱鬯五齊三酒也朱傳云清酒清潔之酒鬱鬯之屬也孔疏云以周禮言之裸獻所用則鬱鬯與醴齊三酒之清酒卑于五齊諸臣之所酢不用之以獻神○儀禮特牲云壺禁在東序尊于戶東玄酒在西又尊兩壺于階東西方亦如之少牢云尊兩甔于房戶之門甔有玄酒○禮記禮也者反本修古不忘其初者也醴酒之用

玄酒之尚又云玄酒在室疏云玄酒謂水也以其色黑謂之玄太古無酒此水當酒所用貴重古物陳設之在于室內而近北○周禮鬱人掌裸器凡祭祀賓客之裸事和鬱鬯以實彝而陳之凡裸事沃盥鬯人掌供秬鬯而飾之凡王之齋事共其秬鬯大宗伯凡祭大神享大鬼祭大兕涖玉鬯肆師祭之日及果蓏齋鄭司農云蓏煮蓏香艸煮以為鬯鄭玄云鬱鬱金香艸宜以和鬯鬯釀秬為酒芬香條

暢于上下也秬如黑黍一稊二米○禮記云諸侯未賜圭瓚資鬯於天子又云周人尚臭鬱合鬯臭陰達于淵泉灌以圭璋用玉氣也又云暢曰以柶杵以梧又云天子親耕粢盛秬鬯以事上帝又云加以鬱鬯以報魄也○王度記云天子以鬯諸侯以薰大夫以蘭芝士以蕭庶人以艾○毛氏云九命錫圭瓚秬鬯○說文云鬱十葉為貫百廿貫築以煮之為鬱一曰鬱鬯百艸之華遠方鬱人所貢芳艸合釀之以降神鬱今鬱林郡也鬯以

秬釀鬱艸芬芳攸服以降神也从凵凵器也中象米匕
所以扱之易曰不喪匕鬯○魏畧云鬱金生大秦國○
陳藏器云其花十二葉為百艸之英二月三月有花狀
如紅藍四月五月採花即香也○本艸圖經云四月初
生苗似薑黃花白質紅末秋出莖心無實根黃赤○
周禮酒正凡祭祀以法共五齊三酒以實八尊
詳見邶風酒
大祭三貳中祭再貳小祭一貳皆有酌數惟齊酒不貳
皆有器量酒人掌為五齊三酒祭祀則共奉之以役世

婦○禮書云濁莫如五齊清莫如三酒祭祀有五齊以神事之也有三酒以人養之也鄭氏以祫備五齊禘備四齊祭備二齊朝用醴齊饋用盎齊諸臣自酢用凡酒然記曰夫人薦盎則醴以上君所酌盎以下夫人所酌而無君饋薦盎之禮矣酒正曰凡祭祀以五齊三酒實八尊則中祭小祭皆備五齊矣

駢牡

傳云周尚赤也○周禮牧人凡陽事用駢牲毛之注云

騂牲色赤毛之取純毛也陽祀祭天於南郊及宗廟○
禮記云周人尚赤牲用騂又云周人騂剛又云於郊故
謂之郊牲用騂尚赤也

鸞刀

正義云鸞即鈴也謂刀環有鈴其聲中節○禮記云割
刀之用而鸞刀之貴貴其義也聲和而後斷也又云祭
之日君牽牲入廟門麗于碑卿大夫袒而毛牛尚耳鸞
刀以割取胾臂乃退燭祭祭腥而退敬之至也○何休

云鸞刀宗廟割切之刀環有和鋒有鸞

按禮記卿大夫袒而毛牛尚耳則人君祭禮執鸞刀者固謂卿大夫也考之儀禮特牲則曰主人立於門戶視側殺少牢則曰主人即位于廟門之外司馬判羊司士擊豕宗人告備乃退則士大夫猶視殺而不親割矣王介甫劉執中乃謂王執鸞刀以親殺此何據耶朱子云主人親執蓋沿王氏之誤國語云天子郊禘之事必自射其牲諸侯宗廟之事必自射其牛

亦不云執刀以殺也

啓毛取脣


郊特牲云毛血告幽全之物貴純之道也注云幽謂血也禮器云納牲詔於庭血毛詔於室羹定詔於堂○楚語觀射父云毛以示物血以告殺接誠拔取以獻具為齊敬也注云物色也告殺明不因故也○又郊特牲云取脣脣燔燎升首報陽也又曰蕭合黍稷臭陽達於牆屋故既奠然後爇蕭合羶薌注云蕭香蒿染以脂合黍

稷燒之

互見前章燔

○賈公彥云按說文及字林臠血祭膋

是牛腸間脂也是臠為血膋為腸間脂也



六家詩名物疏卷四十二

欽定四庫全書

經部

六家詩名物疏卷四十三至五

詳校官監察御史_臣沈孫璉

通政使司副使_臣莫瞻菴_{履勛}

總校官中書_臣朱 鈐

校對官中書_臣吳 俊

謄錄監生_臣楊兆豐

欽定四庫全書

六家詩名物疏卷四十三

明

馮復京 撰

小雅甫田之什一

甫田篇

耘

說文云耘除田間穢也。○左傳云譬如農夫是穠是藂。雖有饑饉必有豐年。注云穠耘也。壅苗為藂。○汲冢周書曰農之服田務耕而不耨。維艸其宅之。○呂氏春秋

云凡禾之患不俱生而俱死是以先生者美米後生者為糝是故其耨也長其兄而去其弟○莊子云芸而滅裂之其實亦滅裂而報予

耨

說文云壅禾本也○食貨志云后稷始畝田以二耜為耦廣尺深尺曰畝長終畝一畝三畝一夫三百畝而播種于畝中苗生葉以上稍耨隴畔因隤其土以附苗根比盛暑隴盡而根深能風與旱

齊

周禮甸師掌帥其屬而耕耨王籍以時入之以供粢盛
注云粢稷也為穀長是以名在器曰盛又云九嬪凡祭
祀贊玉齋廩人大祭祀則共接盛舍人祭祀共簋簠實
之陳之春人祭祀共齋盛之米饌人掌凡祭祀共盛大
宗伯凡祀享祭奉玉齋小宗伯辨六齋之名物與其用
使六宮之人共奉之注云黍稷稻粱麥苽又云祭之日
逆齋省錢肆師祭之日表粢盛告潔大祝辨齋號○禮

記云黍曰薺合梁曰薺其稷曰明粱稻曰嘉蔬又云季秋乃命冢宰農事備收舉五穀之要藏帝籍之收于神倉又云惟社丘乘共粱盛又云天子為籍千畝諸侯百畝以為醴酪粱盛又云八簋之實○左傳云粱食不鑿昭其儉也又云奉盛以告曰潔粱豐盛謂其三時不害而民和年豐也穀梁傳云三宮米而藏諸御廩公羊曰周公盛魯公燾羣公廩○國語曰廩于籍之東南鍾而藏之又云天子郊禘之事王后必自舂其粱諸侯宗廟

之事夫人必自春其盛

犧

孔氏曰羊言犧謂純色四方之神亦太牢言羊以會句
○禮書云牲之純在色犧之完在體然牲者亦必完犧
者亦必純

社

鄭駁異義云社者五土之神能生萬物者以古之有大
功者配之祭法曰共工氏之霸九州也其子曰后土能

平九州故祀以為社又曰后土則社○周禮大司徒設其社稷之壇而樹之田主封人掌設王之社壇凡封國設其社稷之壇令社稷之職鼓人以靈鼓鼓社祭舞師掌教帔舞帥而舞社稷之祭祀牧人陰祀用黝牲毛之大宗伯以血祭祭社稷王大封則先告后土小宗伯掌建國之神位右社稷左宗廟凡天地之大雋類社稷宗廟則為位若大師則帥有司而立軍社奉主車肆師社之日涖卜來歲之稼鬯人凡祭祀社壇用大壘司服祭

社稷五祀則希寬大司樂乃奏太簇歌應鐘舞咸池以祭地示大祝大師宜于社大會同宜于社大司馬仲春教振旅以祭社若師有功獻于社○王制云諸侯祭社稷月令仲春擇元日命民社孟冬大割牲於公社禮運云命降于社之謂穀地又云祀社於國所以列地利禮器云三獻燔郊特牲曰郊特牲而社稷大牢又曰社祭土而主陰氣也君南嚮于北牖下答陰之義也日用甲用日之始也天子大社必受霜露風雨以達天地之氣

也社所以神地之道地載萬物故教民美報焉家主中
雷國主社示本也唯為社事單出里唯為社田國人畢
作唯社丘乘共粢盛所以報本反始也祭法王為羣姓
立社曰大社王自為立社曰王社諸侯為百姓立社曰
國社諸侯自為立社曰侯社大夫以下成羣立社曰置
社厲山氏之有天下也其子曰農能殖百穀夏之哀也
周棄繼之故祀以為稷共工氏之霸九州也其子曰后
土能平九州故祀以為社

按毛傳云社后土也鄭依孝經緯以社為五土之總
神所謂五土者山林川澤丘陵墳衍原隰也非左傳
履后土之后土也左傳蔡墨云共工氏有子曰句龍
為后土后土為社則后土是官名句龍配食于社亦
稱為社也祭社必及稷以同功均利故也稷配以柱
商時又易以棄禮有大社鄭云在庫門內雉門外之
右即冢土也王社先儒或謂建于大社之西國社侯
社宜亦如之賈公彥從崔氏之說謂王社侯社在籍

田內然歷代籍田但祭先農不聞祭社也白虎通云天子之社壇方五丈諸侯半之其主則石也其列則社東稷西也其牲則天子大牢諸侯少牢也其祭有三時仲春命民社孟冬大割牲於公社及孝經緯仲秋禳禾拜社稷是大社國社有稷而王社侯社不置稷者或為民祈報或但祭國之土亦也此外又有勝國之社市中之社若大夫之社其大者則二千五百家為之周禮所云州社也其小則二十五家亦為

之左傳所云書社千社也又鼓人注云社祭祭地祇則大地與神州之祇俱蒙社名故中庸云郊社之禮所以事上帝也此篇首章云或耘或耔已是夏耘之事此章云以社以方鄭氏以為秋報農夫之慶以為大蜡勞農下文祭田祖鄭又以為始耕之事故嚴氏定為明年春之事而以下章為成王省耕朱子又以下章為省耘予以為一篇之詩首尾聯貫強分二年甚為無謂月令云仲夏大雩帝乃命百縣雩祀百辟

卿士有益于民者以祈穀實凡祀五精之帝必配以五人帝神農已配赤熛怒若勾芒蓐收勾龍后稷之等舉該於百辟卿士內矣正應經文祈甘雨介黍稷之事于義為允不必有秋報春祈紛紛之說禮正月祈穀于上帝不聞祈雨也

方

曲禮云天子祭四方歲徧注云祭四方謂祭五官之神於四郊也勾芒在東祝融后土在南蓐收在西玄冥在

北○周禮大宗伯以血祭祭五祀注云五祀者五官之神在四郊四時迎五行之氣于四郊而祭五德之帝亦食此神焉大司馬仲秋云遂以獮田羅罃獻禽以祀祊注云祊當為方獮田主祭四方報成萬物詩云以社以方○左傳蔡墨云少昊氏有四叔曰重曰該曰修曰熙實能金木及水使重為勾芒該為蓐收修及熙為玄冥世不失職遂濟窮桑此其三祀也顓頊氏有子曰犁為祝融共工氏有子曰句龍為后土此其二祀也○鄭志

答趙商云犁為祝融句龍為后土左氏下言后土為社謂暫作后土無有代者故先師之說犁兼之因火土俱位南方

農夫慶

箋云謂大蜡之時勞農以休息之也○周禮黨正國索鬼神而祭祀則以禮屬民而飲酒于序鼓人凡祭祀百物之神鼓兵舞帔舞者太宗伯以鬴辜祭四方百物司服祭羣小祀則玄冕大司樂凡六樂者一變而致羽物

及川澤之亦再變而致羸物及山林之亦三變而致鱗
物及丘陵之亦四變而致毛物及墳衍之亦五變而致
介物及土亦六變而致象物及天神籥章國祭蜡則吹
豳頌擊土鼓以息老物羅氏蜡則作羅襦梓人張獸侯
以息燕○月令孟冬祈來年于天宗臘先祖五祀勞農
而休息之郊特牲云天子大蜡八伊耆氏始為蜡蜡也
者索也歲十二月合聚萬物而索饗之也主先嗇而祭
司嗇也祭百種以報嗇也饗農及郵表畷禽獸仁之至

義之盡也迎猫為其食田鼠也迎虎為其食田豕也祭坊與水庸事也皮弁素服而祭素服以送終也葛帶榛杖喪殺也黃衣黃冠而祭息田夫也八蜡以記四方四方年不順成八蜡不通以謹民財也順成之方其蜡乃通以移民也既蜡而收民息已故既蜡君子不興功明堂位云大蜡天子之祭也雜記子貢觀蜡曰一國之人皆若狂孔子曰百日之蜡一日之澤○傳曰夏曰嘉平殷曰清祀周曰大蜡秦初曰臘○禮書云蜡祭川澤山林

以至土亦天神莫不與焉而所重者八先嗇也司嗇也百種也農也郵表畷也禽獸也坊也水庸也既蜡則臘先祖五祀于廟蜡以息老物臘以息民

鼓

周禮籥章掌土鼓杜子春云土鼓以瓦為匡以革為兩面可擊也又云凡國祈年于田祖歛幽雅擊土鼓以樂田畷注云祈年祈豐年也田祖始耕田者謂神農也田畷古之先教田者○禮運云夫禮之初蕡桴而土鼓注

云築土為鼓也明堂位云土鼓蕢桴葦籥伊耆氏之樂也○樂書云離音絲南方之樂也坎音革北方之樂也甫田之御田祖琴瑟擊鼓者以自冬徂春農事則終而復始百穀則死而復生各有度數存焉土鼓之制窪土以為之故禮運之言土鼓在未合土之前與壺涿氏泡土之鼓異矣

田祖

傳云先嗇也箋云設樂以迎祭先嗇謂郊後始耕也疏

云先嗇神農田祖一也始教造田謂之田祖先為稼穡
謂之先嗇神其農業謂之神農祭田祖時后稷句龍及
典田之大夫亦在祭中○周禮大司徒樹田主注云田
主田神后土田正之所依也疏云田神謂郊特牲云先
嗇與神農一也籥章云國祈年于田祖○前漢書顏注
云田祖稷神也

茨

疏云墨子稱茅茨不剪謂以茅覆屋故箋以茨為屋蓋

○說文云茨以茅葺蓋屋也

梁

疏云孟子十二月興梁成梁謂水上橫橋○爾雅云隄謂之梁石杠謂之碕梁莫大于渙梁○說文云橋水梁也榷水上橫木所以渡者也東楚謂橋為圯○國語云辰角見而雨畢天根見而水涸雨畢而除道水涸而成梁故夏令曰九月除道十月成梁○事始云橋上級謂之雁齒○襍志云橋柱下橫水入沙者謂之蹲鴟

大田篇

種

周禮大司徒辨十二壤之物而知其種以教稼穡樹藝
遂人以土宜教畮稼穡疏云高田種黍稷下田種稻麥
稻人澤艸所生種之芒種司稼辨種稂之種○月令孟
春王命布農事善相丘陵阪險原隰土地所宜五穀所
殖以教導民季冬令告民出五種○孝經援神契云五
土出利以給天下黃白宜種禾黑墳宜種麥蒼赤宜種

菽湊泉宜種稻

螟

箋云螟螣之屬盛陽氣羸則生之○爾雅云食苗心螟
李巡曰言其姦冥冥難知也疏曰舊說螟螣蟊賊一種
蟲也如言寇賊姦宄内外言之耳故捷為文學曰此四
種蟲皆蝗也○許慎云蟲食穀葉者更冥冥犯法即生
螟○陸璣曰螟似蜉蝣而頭不赤○月令仲春行夏令
蟲螟為害○漢五行志云視不明溫與生蟲故有羸蟲

之孽謂螟螣之類當死不死未當生而生或多於故而為災也劉歆以為屬思不容○京房易傳云蔽惡生孽蟲食心○呂氏春秋云蝗螟農夫得而殺之為其害稼也蔽天狀如嚴雪是歲天下失爪瓠又云亂國有螟集其地其音凶凶○春秋漢含孽云螟應苛克○淮南子云枉法令則多蟲螟○雅翼云今食苗心者乃無足小青蟲既食其葉又以絲纏裹眾葉使穗不得展江東謂之蟻蟲孔臧蓼蟲賦曰爰有蠕蟲厥蟲如螟是螟為無

足蟲也

螣

爾雅云食葉蟥李巡曰言假貸無厭故曰蟥也○許慎
曰蟲食苗葉者吏乞貸則生蟥○陸璣曰螣蝗也○月
令孟夏行春令則蝗蟲為災仲夏行春令百螣時起孟
秋行冬令介蟲敗穀仲冬行春令蝗蟲為敗季冬行秋
令介物為妖○五行志云劉歆聽傳曰有介蟲孽也螽
蜚蝻食穀為災○京房易傳云德無常茲謂煩蟲食葉

○蔡伯喈曰蝗蝻也當為災則生水處澤中數百或數十
里一朝蔽地而食禾粟苗盡復移雖自有種其為災
云是魚子在水中化為之○洪範五行傳曰刑罰暴虐
貪叨無厭興師動衆蟲為害矣介蟲有甲能飛揚之類
陽氣所生於春秋為螽今謂之螟皆其類也旱氣動象
至矣○春秋佐助期曰螽之為蟲赤頭甲身而翼飛行
陰中陽也螽之為言衆暴衆也○漢含孳曰天雨螽則
刑法醜

蟲

爾雅云食根蟲李巡曰言其稅取萬民財貨故云蟲也
○說文曰蟲食苗根者也更抵冒取民財則生蟲○京
房易傳曰臣安祿茲謂貪厥災蟲食根○毛詩義疏曰
蟲長而細或說云蟲螻蛄也食苗根而為人患

按今之螻蛄亦為苗患爾雅云螻蛄天螻本艸云螻蛄
一名螻蛄一名天螻一名穀疏云一名碩鼠夏小正
云三月穀則鳴淮南子孟夏螻蛄鳴者是也翅小而

短飛去不遠穴土而居處處有之然此蟲自是蝗類
非螻蛄也

賊

爾雅云食節賊李巡曰言貪狼故曰賊也○陸璣曰賊
似桃李中蠹蟲赤頭身長而細○京房易傳曰與東作
爭茲謂不時蟲食節

駢黑

疏云五官之神其牲各從其方色詩記云來南方則用

駢牲來北方則用黑色○周禮大宗伯云以青圭禮東方以赤璋禮南方以白琥禮西方以玄璜禮北方皆有牲幣各放其器之色注云以為禮五天帝人帝而句芒等食焉

瞻彼洛矣篇

洛

東萊云職方氏雍州其浸渭洛故毛傳以洛為宗周之浸水洛水雖出於京兆上洛西山然其流尚微此詩所

謂洛蓋指東都也○禹貢云導洛自熊耳東北會于澗
澗又東會于伊又東北入于河○山海經云洛出上洛
西山又曰謹舉之山洛水出焉東與丹水合○初學記
云周官豫州其川滎雒與伊澗二水為三川秦于河南
置三川郡按水經云洛水出京兆上洛縣冢嶺山郡經
上洛弘農河南縣盧氏蠡城陽市宜陽洛陽合伊澗穀
澗之水至鞏縣而入河又周禮雍州其川洛汭此洛一
名漆沮出焉此關輔之水非河南洛也又水經注云

洛水出漳水東經洛縣及新都與湔水合此又在蜀土
○春秋說題辭云洛出熊耳山洛之為言繹也言水繹
繹光耀也○河圖云洛水里陰精之官帝王明聖龜
書出文天以與命地以授瑞接河合際居中護羣王道
和洽吐圖佐神逆名亂教摘亡弔存故聖人觀河洛也
○又春秋說題辭河以通乾出天苞洛以流坤吐地符
○淮南子云洛水輕利宜禾○述征記云洛水底有礬
石故上無水○一統志洛水源出陝西洛南縣冢嶺山

東流經河南河南府盧氏永寧宜陽洛陽偃師鞏縣入于河

韎韐

詳見檜風韠

孔氏云韎韐是衣服之名用茅蒐艸染之爾雅一染謂之鰲韎韐是鰲也大夫以上祭服謂之韐士無韐名謂之韎韐○士冠禮爵弁服纁裳純衣緇帶韎韐注云韎韐緇韐也士緇韐而幽衡合韋為之士染以茅蒐因以名焉今齊人名蒨為韎韐韐之制似韠○朱傳云韎茅

菟所染色也韞韞也所謂韞弁

六師

劉公瑾云天子六軍出自六鄉蓋萬二千五百家為鄉
凡起徒役毋過家一从故萬二千五百家為一軍六軍
總七萬五千人也

鞞

傳云容刀鞞也○說文云刀室也○左傳云藻率鞞鞞
昭其數也○內則子事父母右佩璫注云璫刀鞞也

按鞞琫琕三字之義爾雅無文故此傳云鞞容刀鞞也琫上飾琕下飾公劉傳云下曰鞞上曰琫孔氏曰鞞者刀鞘之名琫者鞘之上飾下不言其飾指鞞之體故曰下曰鞞上則有飾可名故曰上曰琫是毛說本矛盾孔亦不得已而為之辭也釋名因之曰下末之飾曰琕琕卑也在下之言琕當是鞞字與毛公劉之傳同杜氏左傳注則以鞞為上飾琕為下飾又倒置無據劉規其過是也仲達不得為之佞臣

琕琕

毛傳云琕上飾琕下飾天子玉琕而琕琕諸侯璫琕而
璫琕大夫璫琕而璫琕士琕琕璫琕○說文云琕蜃甲
所以飾物也○爾雅云黃金謂之璫其美者謂之璫白
金謂之銀其美者謂之璫郭璞曰璫即紫磨金也○釋
文云璫音蚪玉也璫又作璫玉也

六家詩名物疏卷四十三

欽定四庫全書

六家詩名物疏卷四十四 明 馮復京 撰

小雅甫田之什二

桑扈篇

屏

爾雅云門屏之間謂之宇屏謂之樹疏云屏蔽也樹立也立牆當門以自蔽也諸侯內屏在路門之內天子外屏在路門之外而近應門○郊特牲云旅樹大夫之僭

禮注云旅道也樹所以蔽行道明堂位云疏屏天子之
廟飾注云屏今桴思也刻之為雲氣蟲獸如今闕上為
之矣○禮緯云天子外屏諸侯內屏大夫以簾士以帷
○天文書云屏四星在端門內近左執法

翰

傳云翰幹○釋詁云楨幹也舍人曰楨正也築牆所立
兩木也幹所以當牆兩邊障土者

鴛鴦篇

鴛鴦

古今注云鴛鴦水鳥鳬類雌雄未嘗相離人得其一則一者相思死故謂之匹鳥○荊楚記云節木鳥鴛是也食療本艸云食鴛肉令人美麗夫婦不和與食立相憐愛○雅翼云歸藏曰有鳬鴛鴦蓋鳬屬雄名為鴛雌名為鴦大如鴛杏黃色頭戴白長毛垂至尾尾翅皆黑黃赤五采者有纓者皆鵞鵝耳

畢

月令云羅罔畢翳注云罔小而柄長謂之畢○大東傳云畢所以掩兔疏云象畢星為之

廡

說文云廡馬舍也○曲禮云君子將營宮室宗廟為先廡庫為次○周禮校人云三乘為皂三皂為繫六繫為廡六廡成校園師掌春除蓐繫廡○釋名云廡鳩也聚也牛馬之所聚也○左傳疏云凡馬春分百艸始繁則牧于坰野秋分農功始藏水寒艸枯則皆還廡此周典

之制也○星經云天廡十星在壁北主天子馬坊廡苑之官也

頽升篇

蔦

爾雅云寓木宛童郭云寄生樹一名蔦○陸璣云葉似當盧子如覆盆子赤黑甜美○本艸云桑上寄生其實明目輕身通神一名寄屑一名寓木一名宛童一名蔦生弘農川谷桑樹上三月三日採莖葉陰乾陶隱居云

桑上者名桑上寄生爾詩云施于松上方家亦用楊楓
上者各隨其樹名之生樹枝間寄根在皮節之內葉圓
青赤厚澤易折旁自生枝節冬夏生四月花白五月實
赤大如小豆蘇恭云此多生槲櫟柳木楊楓等樹上子
黃大如小棗實九月始熟陶說非也圖經云寄生云是
烏鳥食物子落枝節間感氣而生葉似橘而厚軟莖似
槐枝而肥脆三四月開花黃白色六七月結實黃色如
小豆

女蘿

毛公云女蘿菟絲松蘿也○陸璣云菟絲蔓連艸上黃赤如金今合藥菟絲子是也非松蘿松蘿自蔓松上生枝正青與菟絲殊異○本艸云松蘿一名女蘿生熊耳山川谷松樹上五月採○藥性論云松蘿能治寒熱吐客痰

按菟絲名女蘿爾雅所云是也松蘿亦名女蘿博雅及本艸所云是也古詩云與君為新婚兔絲附女蘿

李善云二者異艸毛公誤合為一此詩女蘿施松自是松蘿耳與兔絲了無涉釋文云在艸曰兔絲在木曰女蘿亦非蓋兔絲亦蔓延于木也

霰

箋云將大雨雪始必微溫雪自上下遇溫氣而搏謂之霰久而寒勝則大雪矣○爾雅云雨霓為霄雪疏云水雪雜下也因名霄雪霄即消也○月令仲冬行夏令則天時雨汁注雨雪雜下為汁○大戴禮曾子云陽之專

氣為霰陰之專氣為電盛陽之氣在雨水則溫暖為陰
氣薄而脅之不相入則搏為電也盛陰之氣在雨水則
凝滯而為雪陽氣薄而脅之不相入則消散而下因水
而為霰○穀梁說云電者陰脅陽之象霰者陽脅陰之
符○釋名曰霰星也水雪相搏如星而散○宋書符瑞
志云韓詩曰先集維霰薛君注霰英也花葉謂之英然
則霰為花雪○埤雅云說文曰霰稷雪也閩俗謂之米
雪言其霰粒如米所謂稷雪義蓋如此今名瀟雪亦名

濕雪

車牽篇

鷓鴣

爾雅云鷓鴣雉郭云即鷓鴣也長尾走且鳴○說文云鷓
走鳴長尾雉也乘輿以尾為防鉤著馬頭上○陸璣曰
鷓鴣微小于雉走而且鳴色如雄雉尾如雉尾而長其頭
上有肉冠冠上聚毛長數寸如雄雉尾角內甚美故林
麓山下人語曰四足之美有鹿兩足之美有鷓○山海

經曰女几之山多白鵲○禽經云火為鵲亢為鵲○薛
綜云雉之健者為鵲尾長六尺

青蠅篇

青蠅

王充云青蠅所污常在練素○段成式云青蠅糞能敗
物雖玉亦不免所謂蠅矢點玉○陸佃云青蠅首赤如
火背若負金傳曰以冰致蠅蠅逐臭者懷蛆縈利喜煖
惡寒故遇冰輒側翅遠引○劉執中云蛆蟲變成者青

蠅也其止于物則穢敗之又從而生蛆蛆復變為蠅穢敗于物無有紀極

賓之初筵篇

筵

詳見邶風席

春官司几筵注云筵亦席也鋪陳曰筵藉之曰席○說文云筵竹席也周禮曰度堂以筵筵一丈○釋名云筵衍也舒而平之衍衍然也○陳氏云筵席之制短不過尋長不過常中者不過九尺公食大夫蒲筵常萑席尋

匠人明堂度九尺之筵純綠之制上不過黼下不過緇
布○儀禮鄉射席賓南面東上衆賓之席繼而西席主
人於阼階上西面蒲筵緇布純西序之席北上大射小
臣設公席於阼階上西鄉司宮設賓席於戶西南面有
加席

核

天官籩人饋食之籩其實棗栗桃乾榛榛實

射

互見鄭風射

傳云燕射之禮箋云大射

按天子諸侯射禮有三曰大射曰賓射曰燕射大射是將祭擇士之射賓射是諸侯來朝天子入與之射或諸侯相朝而與之射燕射是息燕而與之射其侯大射張皮侯而棲鵠賓射張采侯燕射張獸侯其射之處則大射先習於澤後射於射宮天子射宮蓋在廟鄉射記云於郊則閭中則天子大射亦在虞庠諸侯在太學也賓射天子在朝射人云諸侯在朝則皆

北面是也諸侯在國內與天子同在朝或國外相會則在竟故鄉射記云於竟則虎中也燕射則在於路寢以燕禮朝服於寢故也其耦則大射賓射王以六耦畿內諸侯以四耦畿外諸侯卿大夫士皆三耦燕射例同三耦而已此詩毛以為燕射鄭以為大射按燕禮大射禮諸侯與其臣行禮皆宰夫為主人納賓及庭公降一等揖之公升席賓升自西階主人從之賓右北面再拜賓答拜主人降洗賓降主人辭降主

人取觚洗賓辭洗主人卒洗賓揖升筵前獻賓賓拜受爵于筵前然後賓升筵是初筵折旋揖讓之事也飲酒孔偕云者二禮賓主獻酬及獻公之屬是也鐘鼓既設者燕禮云樂人縣又云若射如鄉射之禮鄉射云樂正適西方命弟子贊工遷樂于下注云當辟射也然則此設鐘鼓亦為將射改縣也王宮縣階間有妨射位與國君大射軒縣及階間但有鼓者不同明天子大射當改縣矣燕射準鄉射自然當改縣也

云舉酬逸逸者是二禮滕爵于公之後為賓為卿為大夫舉旅之禮也鄉射大夫士禮則無舉旅之文大侯既抗云者燕射自天子至士皆一侯上下共射之鄉射記所云天子熊侯白質諸侯麋侯赤質者也大射之侯則天子虎熊豹畿外諸侯熊羆豸畿內諸侯熊豹天子自射虎侯九十弓畿外諸侯自射熊侯亦九十弓故大射禮謂熊侯為大侯此大侯在天子則虎在國君則熊也鄉射張侯下綱不及地武不繫左

下綱中掩束之既納射器比三耦司正為司馬命張
侯弟子脫束遂繫左下綱所謂既抗者也鄭則以大
射前射三日量人巾車已張三侯明天子三侯亦射
前三日張之故以抗為棲鵠于侯中然大射亦云張
三侯不繫左下綱射末巾車量人解左下綱但將射
無繫左下綱之節或文不具耳鄭未為的論也自是
司射誘射既射兩番釋獲司射命設豐司宮士奉豐
由西階升坐設于西楹西勝者之弟子洗解升酌散

南面坐奠于豐上司射及三耦及衆射者勝者皆袒
決遂執張弓不勝者皆襲脫決拾却左手右加弛弓
于其上遂執拊勝者先升堂不勝者進北面坐取豐
上之觶興少退立卒觶坐奠于豐下三耦卒飲衆皆
繼飲射爵如三耦及第三番用樂射不勝者升飲亦
如初儀所謂罰不勝之爵也由是則旅酬及于士而
禮終矣此燕射大射之禮大率然也毛既以此為燕
射至次章籥舞笙鼓十句所說不明王肅以為燕樂

之義得則能進樂其先祖故言烝衍非是實祭不思
祭祀感神獲福與燕何涉可謂牽率之甚矣其釋賓
載手仇二句云主人請射于賓賓許諾自取其匹以
射主人亦入于次又射以耦賓考之禮則請射者司
射非主人自請也耦者有司所比非賓自取也不知
毛何以云然朱傳稱熊侯白質諸語及三耦皆據燕
射又引大射宿縣之文未知朱子之意以此為大射
乎抑燕射乎

的 五見齊風侯

傳云的質也孔氏云周禮鄭衆馬融注皆曰十尺曰侯
四尺曰鵠二尺曰正四寸為質王肅云質方六寸鄭以
大射之侯其中制皮為鵠賓射之侯其中采畫為正正
大如鵠中皆居侯中三分之一此傳惟云的質也蓋亦
以為所射處與鄭同燕射則謂麋侯白質者

子孫奏能

鄭氏云士之祭禮上嗣舉奠因而酌尸天子則有子孫

獻尸之禮○劉瑾云特牲三獻之後長兄弟洗解獻尸尸飲畢酢之長兄弟受而卒爵少牢下篇三獻之後亦有二人洗解酌獻之禮各奏爾能謂此類與

室人

孔氏曰特牲注云佐食賓佐尸食者也謂于賓客之中取人令佐主人為尸設饌食特牲佐食一人少牢佐食二人未知天子諸侯當幾人也特牲三獻之後長兄弟洗觚為加爵又曰衆賓長為加爵注云大夫三獻而禮

成多之者為加是賓手挹酒室人復酌為加爵也特牲止有賓長為加爵不及佐食此言賓與室人俱為加爵者天子之禮大故佐食亦為加也○特牲記云佐食玄端玄裳黃裳雜裳可也皆爵韞佐食當事則戶外南面無事則中庭北面凡祝呼佐食許諾佐食于旅齒于兄弟

監

朱子云監史司正之屬燕禮鄉射恐有解倦失禮者立

司正以監之察儀法也○鄉飲酒禮鄉射禮曰作相為司正燕禮曰射人為司正大射曰擯者遂為司正

史

呂東萊云淳于髡說齊威王曰賜酒大王之前執法在旁御史在後此人君燕飲之制猶存于戰國者也立之監即執法也鄉射注所謂立司正以監察儀法者也佐之史即御史也董氏所謂佐之史以書之者也○周禮大史掌建邦之六典小史掌邦國之志內史讀四方之

事書掌書王命外史掌書外令達書名于四方御史掌
邦國都鄙及萬民之治令以贊冢宰掌贊書凡數從政
者○禮記云史載筆士載言又云動則左史書之言則
右史書之○大戴禮云太子既冠成人免于保傅則有
司過之史○韓詩外傳云據法守職而不敢為非者太
史令也○左傳云君舉必書書而不法後嗣何觀○史
通云古者言為尚書事為春秋左右二史分尸其職昔
軒轅受命倉頡沮誦實居其官曲禮曰史載筆大事書

之于策小事簡牘而已至于諸侯列國亦各有史官

殺

爾雅云夏羊牡踰牝殺注云夏羊黑殺羝也今人便以
牂殺為白黑羊名○羅氏云殺本夏羊牝者之名吳羊
白夏羊黑殺羊之角主明目安心益氣輕身辟鬼魅虎
狼療疥蟲蠱毒結氣止寒泄為用最大而詩云俾出童
殺脅目必無之物猶言而無實不為用也殺在今世但
為黑羊之名不取牝義而音又通于牯故本艸殺羊條

注稱牯羊牯乃牯之名

六家詩名物疏卷四十四